

Inzko: 2012. može biti prelomna godina za BiH



Nedavni događaji ulijevaju istinsku nadu da bi 2012. godina zaista mogla biti prelomna godina za Bosnu i Hercegovinu na putu ka potpunoj integraciji u euroatlanske institucije ukoliko politički lideri ispune obaveze koje su preuzeli, rekao je visoki predstavnik, Valentin Inzko, tokom današnje sjednice Vijeća sigurnosti Ujedinjenih naroda u New Yorku.

Predstavljajući svoj redovni šestomjesečni izvještaj o provedbi Daytonskog mirovnog sporazuma, visoki predstavnik je obavijestio Vijeće sigurnosti da se, nakon formiranja novog Vijeća ministara u februaru, vide znaci pozitivnih promjena. "Imamo politički proces zasnovan na dijalogu i spremnosti na kompromis. Ovo vraćanje političkom dijalogu, pregovaranju i postizanju kompromisa, do čega je trebalo doći daleko ranije, je jako dobra vijest."

Govoreći o preostalim pitanjima državne imovine i vojne imovine, Inzko je pozdravio dogovor šest političkih stranaka postignut 9. marta kao "pozitivan korak". Što je najvažnije, napredak u vezi sa pitanjem vojne imovine pomogao bi da se stvore pravi uvjeti za puno učešće Bosne i Hercegovine u Akcionom planu za članstvo u NATO-u (Membership Action Plan – MAP). "Ono što sad treba pokazati je djelovanje državne i entitetskih vlada u smislu provođenja dogovora koji su postigli."

Visoki predstavnik je informirao Vijeće sigurnosti i o

određenim negativnim događajima, uključujući izazove uperene protiv mirovnog sporazuma.

U završnom obraćanju visoki predstavnik je primijetio da posljednja dešavanja daju nadu u istinski napredak u Bosni i Hercegovini. "Potrebno je ojačati ovaj prevladavajući pozitivan trend i održati zamah postignut na putu ka evroatlantskim integracijama," rekao je visoki predstavnik Inzko.

Photo: UN Photo/Evan Schneider